


## BILBOKO BURTSA



ASTEKO BILAKAERA



## Bilboko balore merkatua bare-bare eta iraileko mugimenduaren zain

IBON ALONSO / BILBO

Aste honetan nazioarteko merkaturatan ezagutu den baretasuna hemengo merkatura etorri da, batez ere berreskurapenaren ildotik. Honela, SESBen gertatutakoaren ondorioz burtsa balioak saldu zituzten inbertsariak errenta aldakorrera itzuli dituzte diruak.

Bilboko Burtsaren astelehen ekitaldia ezin hobea izan zen, indize orokorrak 8,30 puntu irabazi bait zituen, azkenean 378,51ko mailan kokatuta. Alor guztietan gorakadak nabariak izan ziren, bankuak (+13,52), kimikoak (+4,89) eta komunikabideen (+3,53) alorretan bereziki. Dena den, merkatuaren erakarpena Bodegas Bilbainas eta Corporación Ucem balioetarantz abiatu zen eta hauek 50 eta 75 pezetako irabaziak lortu zituzten.

Asteartean, joera gorakorra amaituta Bilboko Burtsaren indizea 0,46 puntu jaitsi zen eta 378,05 mailan finkatu zen. Kontratazio bolumenari dagokionez, abuztuaren oizkoak diren mailak eman ziren. Elektrikoak eta aseguroak izan ezik, beste alor guztiek behera egin zuten. Mozkinen bilketa nazioarteko merkaturatan emandakoaren ondorioa izan zen. Bezperan bezala, Bodegas Bilbainas balioek burtsaren erakarpena eskuratu zuen kotizazio berdinarekin. Merkatu jarraiari dagokionez, aurreko egunetako galeren berreskurapena somatu zen, batipat bankuen alorrean.

Asteazkeneko ekitaldian indize

orokorra 376,27 mailan ezarri zen eta 1,78 puntu galdu zituen. Prezioak berdin jarraitu zuten eta kontratazio maila txikiak izan ziren. Heltzerak eta zerbitzuen taldeek emaitza positiboak eduki zituzten alor bakoitza izan ziren. Oraingoan, Bodegas Bilbainas prezioak 10 puntu galdu zituen. Nazioarteko burtsetan mozketak izan ziren.

Ostegunean Bilboko Burtsaren indize orokorrak 1,63ko irabazia lortu zuen eta 377,90 mailan kokatu zen. Inbertsio eta aseguruaren alorra (+4,50) eta zerbitzuak (+3,20) gorakada handiena lortu zuten, kontratazio bolumen txikiak ekitaldian. Altxor letren tasak bere horretan jarraitu ondoren goizeko hasiera gorakorra ez zen puskatu, nahiz eta negozioaketa maila urteko mailarik txikiena izan. Irabazien artean azpimarratu behar ditugu Bodegas Bilbainas (+10), BNP (+5) eta Bankoa enpresen balioek lortu zituztenak.

Ostiraleko ekitaldian indize orokorra 378,82an ezarri zen, 1,43 puntu irabazi eta gero. Egonkortasuna nagusitu egin zen aste honetako azken ekitaldian eta emaitzarik positiboena heltzerak eta zerbitzuak izan ziren, honek 4,90 puntu irabazi zituen eta.

Abuztuaren hilabeteak % 2,2ko gehikuntza ekarri dio Bilboko Burtsari. Herenegun salmenta eta erosketak agindu gutxi izan ziren parkean. Aipatu beharra dago Bankoa entitateak bono bihurtzearen jaulkipena iragarri duela. Jaulkipen horrek 1.500 milioi pezetako dirutza suposatzen du.

## Kutxako lehendakarikide kargutik kendu dute Juan Jose Etxeberria

DONOSTIA


Kutxako Administrazio Kontseiluak, Juan Jose Etxeberria lehendakarikidea kargutik kentzea erabaki zuen pasa den ostegunean egindako bilera berean. Gipuzkoako Diputazioarekin batera Kutxaren fundatzailea den Donostiako Udalak eskatu zuen erabaki hau hartzea.

Era berean, Kutxak aurreko udal taldearen izenean zituen kontseilari guztiak beren postuetatik kenduak izan dira.

## ALDAKETA POLITIKOEN ONDORIO

Beraz, fusio prozesuan agindutako epeak bete edota zuzendaritza organu guztiak berrizatu artean, Gotzon Olarte Kutxaren beste lehendakaria izango da buru bakarra. Organuen berriztatzea Eusko Legebiltzarrak eztabaidatu duen Aurrezki Kutxen lege berriarekin batera emango da.

Kutxako Administrazio Kontseiluak hartu duen erabakia, Gipuzkoa-



Juan Jose Etxeberria.

ko Diputazioan zein Donostiako Udalean izan diren aldaketa politikoaren ondorioz eman da, Eusko Alkartasunak eta Euskadiko Ezkerrak ardura gehienak galdu dituztelako, alegia. Donostiako Udalek izendatu ditu, jadanik, dagozkion hamar ordezkari berriak.

## McDonnell abioietan DYEek parte hartuko duen erabakitzeke dago

BILBO

McDonnell hegazkin konpainiak MD-12-X abioi berrien hegala egi-teaz zein enpresa arduratuko den ez du oraindik erabaki, baina badirudi hilaren erdi aldera jakingo dela Duñarruti y Estancona (DYE) euskal enpresa izango den ala ez.

DYEek, CASA enpresa espainiarrekin batera, Caesa elkarte filiala eratu du, proiektu hau eskuratu ahal izateko. Iturri ezberdinek oso posibletzat jo dute euskal partizipazioa hegazkin berriaren eraiketan.

McDonnellek egingo duen abioaren hegala eraikitzeke proiektuak 130.000 milioi pezetako (7.223 milioi libera inguru) inbertsioak eskatuko ditu eta 6.000 lanpostu zuzen eta zeharkako sortuko ditu. Urteko fakturazioa 90.000 milioi pezetara (5.000 milioi libera) helduko da.

Proiektu garrantzitsu hori Euskal Herrian garatu ahal izateko, institu-

zio eta Caesako arduradunak hainbat finantz eta industria arloko erakunderekin hasi dira harremanetan, BBV eta Iberdrola tarteko, bazkideak lortzeko helburuarekin.

## EUSKAL AERONAUTIKAREN SORGUNE

Gasteizko Gobernuko lehendakaria

riordeak, Jon Azuak proiektuaren garrantzia azpimarratu du, euskal aeronautika industriaren «sorgunea» izan daitekeela adieraziz.

Eusko Jaurlaritzak, Gasteizko Hazienda eta Bizkaiko Diputazioak proiektuaren bidegarritasunari buruzko hainbat ikerketa egin dituzte, emaitzarik jakin erazi ez bada ere.

DYE euskal enpresak goi teknologiako erreminta makinak produzitzen ditu gehien bat eta azken aldian aeronautika industriarekin harreman gehiago ditu. Dagoeneko, Airbus, Boeing eta McDonnell-ekin egiten du lan, hegazkin osagarriak mekanizatuz.

## EAEko industriek % 13 merkeago erosi zuten esnea 1990. urtean

BILBO

Iaz 1989. urtean baino merkeago erosi zuten behi esnea Euskal Autonomi Elkarteko (EAE) industriek, prezioa % 13 jaitsi bait zen, Gasteizko Gobernuak Nekazaritza eta Arrantza sailaren txostenean adierazitakoaren arabera.

Behi esnearen salneurri jaitsiera Espainiako esne industriaren erabakien ondorioz eman da, «kostuak murriztuz Europako Komunitateko produktioek suposatzen duten lehiari aurre egiteko» iturri ofizialen arabera.

Merketze prozesua, Espainiako «gehiegizko» esne produktioak eta gurina eta beste produktu eratorriek izandako prezio jaitsierak bultzatu du baita ere. Iazko esne soberakina kontsumoan izandako beherakada apalak eta esportazioen jaitsierak eragin dute batez ere.

Europako Komunitateari dagokionez, esnekien prezioek % 33 egin dute behera. Salneurrien jaitsiera horren ondorioz EKko baserriarrek batezbeste % 5 gutxiago irabazi zuten joan zen urtean.

## Aviacoko langileen lanuztean normaltasuna izan zen nagusi

BILBO

Normaltasuna izan zen nagusi, Aviacoko aire konpainiak hegaldietako laguntzaileek deitutako lanuzteak, batez ere, hegaldian, hegazkinetan eskaintzen diren prentsa banaketa eta jatetxe zerbitzuetan. Arazo horiek konpondu nahian, abioian sartzeko unea, eman zitzaizkien bidaiariei, egunkari nahiz elikagaiak.

Hala ere, eraginik izan du hegaldietako laguntzaileek deitutako lanuzteak, batez ere, hegaldian, hegazkinetan eskaintzen diren prentsa banaketa eta jatetxe zerbitzuetan. Arazo horiek konpondu nahian, abioian sartzeko unea, eman zitzaizkien bidaiariei, egunkari nahiz elikagaiak.

Grebara deialdia berriz, Bidaiarien Kabinetako Tripulanteen Sindikatuek (SITC-PLA) egin zuen, eta neurri horrekin lortu nahi dena da, Aviacoko hegaldietako laguntzaileek, Iberia enpresa-koak adinako soldata izatea. Enpresa batzordeak ez du baztertu, irailean lanuzteekin jarraitzea, oraindik ez bait da inolako elkarrizketarik izan enpresarekin. Hala ere, Aviacoko iturriek adierazi dutenez, negoziazioak hasteko prest leudeke.



Hegazkinen hegala eraikitzeke proiektuak 130.000 milioiko inbertsio behar du.

BILBOKO UDALA  
AYUNTAMIENTO DE BILBAOZIRKULAZIO-NEURRIAK SABINO ARANA ETORBIDEAN  
"METRORAKO" LANAK DIRELA ETA

Babes Zibil eta Zirkulazio Sailak honako hau jakinarazten du: Sabino Arana etorbidean eta Victor Txabarri plazan burutzen ari diren lanak direla eta, datorren irailaren 2tik aurrera zirkulaziorako saihebidetarako jarriko direla aipatutako etorbidean.

Saihebidetarako behar bezala eta aldez aurretik adieraziko dira, eta gida-

riei arreta handiz ibiltzeko eskatzen diegu obrak dauden alde horretatik pasatzean.

Denek jakin dezaten ematen da aditza.

Bilbo, 1991ko abuztuaren 30ean

BABES ZIBIL ETA ZIRKULAZIO  
SAILEKO ORDEZKARIA

